



Die Gsalzene

Vermuetligg numme alti Männer – s'isch fataal
 Steen im Herbscht als US-Breesidant zer Waal
 Mir sinn gespannt, ob die, wo noch dämm Amt dien strääbe
 Dr Waaltermin daatsächlich physisch no erlääbe
 Wie d'Party noch de Waale wird, das isch no ghaim
 Mir tippe uff phirierti Snacks im Pfläägeheim!

S'isch wider WEF und in de Zytige stoot gross:
 «Es wird spannend, Röschi wider in Davos!»
 Do frooge mir als Kech uns ainzig und ellai:
 Nur mit Spägg oder au no mit Spiegelai?

Dr Womanizer Alain Berset - s duet is quääle
 Fraueheld und Bundesroot isch wäg - duet fääle
 Nur d'Fraue z Bärn dien jetzt vuy! Bosityyvs entdegge
 Die mien sich nämmliigg nymme uff de Baum vrstegge
 Und uf sim Abschiedsvideo seen mir sehr gäärn
 Si allerletschte Sytesprung im Byyro z' Bärn

Staarggi Handynutzig – kaschs nid ignoriere
 Duet d'Zyggigsfähigkeit vo Männer reduziere
 Jetzt sott me doch vo dääre Daatsach profydiere
 Und jedem Zyrcher Maa e Handy offeriere

Syt em Debakel bi dr Crédit Suisse gitt's Grach
 Und unsri Bängger griege heftig ains uffs Dach
 Me hett se als Kameel und Ratte tituliert
 Do hett dr Tierschutz denne scharf interveniert
 Kameel und Bängger unterschaidi doch e Huffe
 S' Kamel kenn drei Daag schaffe ooni ständig z'suffe
 Au dr Vrglyych mit Ratte sigi nid zem lache
 Denn s'gäb schon Sache wone Ratte nid wurd mache
 In de Fuudischübbe – das isch au nid nytt
 Hetts jetzt au mol e freie Blatz fir andri Lytt
 Drby hänn Jobverlüscht au Vordail – mir hänn's grafft
 Bim Schrybdisch ruume hänn die Bängger s'erscht Mol gschafft
 Und ihri bruefligg Zuekunft hänn si bald im Griff
 Als Kurierfaarer fir Koks bi «Uber Sniff»

S' gitt okulti Ritual, wo jede kennt
 Hiener uff Friedheef z' opfere isch voll im Trend
 Und will Fasnacht nur bi Scheenwätter duet glinge
 Häm mir do drfy e Opfer welle bringe
 Als Dierlischitzer simmer zem Hörnli marschieret
 Und hänn uff Grabstai Tofu-Plätzli arrangiert.

150 Joor – dr Zolli jubiliert
 Und jede bsuecht das Dier, wo är favorisiert
 Styrbearnti bi de Geier, dasch nid schreeg
 Weight Watchers dräffe sich spontan bim Nilpfäärdgheeg
 Versicherigsverträter geen zue de Hyäne
 Leerer und Fuultier dien gärn mitenander gääne
 Frindschafte schlesse Aawält mit de Kakerlaake
 So viil Arm zem döple - Priester liebe d'Kraake
 Wäärend ins Affehuus die ganz Regierig goot
 Daagt am Affefelse scho dr Grossi Root

Und no dr Monschervärs

Griezi Tourischte, Bsuecher, Gescht
 Mir breesentiere Ihne s'Bescht
 Nämme si Blatz zer Stadtrundfaart
 Vo dr bsundre Basler Art

Baustelle hänn do Tradition
 Gheere scho lang zem guete Doon
 Drumm hett's bi uns ganz generell
 All 20 Meter e Baustell

Scho d'Kelte hänn sich nid geniert
 Basel mit Baustelle bloggiert
 Wo d'Römer do hänn welle lande
 Sinn si scho z'Rieche im Stau gstande

Und hett's emol eventuell
 Amene Egge kai Baustell
 Herrscht drotzdämm yberhaupt kai Not
 Denn dert sin d'Ample ständig rot!

Will halt Velo duure mien
 Ischs mängmool drei Sekunde grien
 Doch eigendliigg weiss jedes Kind
 Velofaarer sinn farbeblind

Fyr d'Autofaarer hetts am Rand
 Amme e Verpfälligstand
 Und sott me anders z'Äasse welle
 Ka me jo Ample-Uber bstelle

D Regierig duet au offeriere
 Coiffeure z'schigge zem rasiere
 Und Psychiater dien zueloose
 Bi Hyylgrämpf wäg' Amplepsychoose

Und ka me 20 Meter faare
 Sott me sich Fraideschrey erspaare
 Will denn findet sicher grad
 E Intifadademo statt

Au in d'Heechi goot nid vuy!
 Dr Globus-Neubau isch s'Byspiil
 Dä wird schynt's fertig uf Termin
 So wie dr Flughaafe z'Berlin

Mir wäre Richtig Zentrum gfaare
 Doch dä Versuech ka me sich spaare
 Will iber d'Margarethebrugg
 Kamme weder hi no zruigg

Z'Basel giengs wohl dytliigg schnäller
 Wär do nid unsers Esthi Käller
 As vrsuecht im grosse Ganze
 Jeede Daag zwai Baimli z'pflanze

Vermässe isch drum schlussamänd
 Dr Nämme Baudepartemänd
 Aber d'Byyroo kennte blyybe
 Zem e Schloofklinik betryybe!

Si könnes drumm sicher vrstoo
 Mir sind kei Meter vorwärts koo
 Gohet nid bi däre Strosselaag
 Adiee zämme - scheene Daag!

Und bitte sinn Si sich im Glaare
 Mir bruuche Strosse nid zem Faare
 Und dien Si ruhig dehaim vrzelle:
 «Basler sinn süchtig noch Baustelle!»

D'Baustellepandemie foot aa
 Jetzt kunnt bald die ganz' Schwyz dra
 Ain vo Basel - tarnt in rot
 Sitzt scho in Bärn im Bundesrot!

Die Situation kennt eskaliere
 Wie sotti d'Schwyzz druff reagiere
 S' gitt nu ei Wäg us däre Not
 Die Gsalzene in Bundesrot!